

至順鎮江志卷四

土產

京口依山瀕江故多山林川澤之利凡稼穡絲枲  
蟲魚草木果蔬之屬雖細大不齊然茲地所生皆  
曰土產今摭縉紳之論採閭閻之說考諸圖經倣  
諸他志區分類別亦不厭其繁焉

穀

稻

有秔有糯秔之種又有大小之分土人謂大稻秔小  
稻秔大稻之種十有六曰香子曰鯽魚曰灰鶴曰時  
裏白曰八月白曰蘆花白曰浪裏白曰白蓮子曰紅  
蓮子曰早紅芒曰晚紅芒曰青州黃曰稈川口曰馬

至順鎮江志

卷四

一

尾烏曰老了烏曰下馬看小稻之種六曰白曰紅尖  
日晚秔曰六十月曰八十月曰百日者又皆以熟之先後  
為名百曰日本自占城來宋會要大中祥符五年遣使  
福建取占城禾給江淮兩浙分種之糯之種亦有九  
曰芒曰香曰晚曰抄社曰羊脂曰牛蝨曰虎斑曰栢  
枝曰長稈江南稻種甚多不可枚舉然茲土之所宜  
者大率不過  
此數種也

按詩集傳稻即南方所謂稻米水生而色白說文  
沛國呼稻為糯徐鍇曰糯糯也許慎謂稷為秣稻  
為糯今則同之爾雅秣稻注今沛國呼秣詩十月  
穫稻以釀酒月令秣稻必齊則稻是糯論語食夫  
稻則稻是秣周禮注秣稷也內則牛宜秣則秣是  
秣詩豐年多黍多稌為酒為醴則秣是糯故急就  
章注稻者有芒之穀總名也亦呼為秣  
字林云糯黏稻而秣稻不黏此其異耳

黃粟

唐地理志潤州土貢  
黃粟然今無此種





按爾雅粢稷注今江東人呼粟為粢疏左傳云粢食不鑿粢者稷也曲禮云稷曰明粢然則粢也稷也粟也正是一物而本草稷米在下品別有粟米在中品故先儒其疑焉又本草注孟詵云粟米顆粒小者是粢米粒麤又陶隱居云青梁白梁黃梁皆是粟類惟其牙頭色異為分別耳唐注黃梁出蜀漢商浙間亦種之食之甘美逾于諸粟人號竹根黃故內則云飯黃梁梁食之美者故稱膏梁

互見土貢門

### 麥

有大小之分大麥之種有二曰春自十月至正月皆可種然又早熟曰黃稈後熟小麥之種有三曰赤殼曰白殼曰宣州晉大興元年詔曰徐揚二州土宜三麥可督令糶地投秋下種至夏而熟繼新故之交於以周濟所益甚大昔漢遣輕車使者汜勝之督三輔種麥而關中遂穰勿令後晚其後頻年麥雖有旱蝗而為益尤多

### 至順鎮江志

#### 卷四

二

### 豆

按廣雅曰大藪也小藪也本草注大麥即青顆麥形似小麥而大皮厚故謂之大麥小麥秋種夏熟受四時氣足兼有寒溫麪熟麩冷宜其然也又有喬麥秋花冬實亦堪作麵

亦有大小之分大豆其色有青黃黑紫褐之異其名有雁來青雁來枯痴黃半夏黃之別小豆亦有赤綠白黑四種又有江豆豌豆佛指豆十六粒豆蠶豆隔歲種之蠶熟時可採黑白菹豆蔓生籬落間採其莢蒸食甚美白者可入藥

按爾雅戎菽謂之荏菽注即胡豆也詩藪之荏菽鄭箋亦以為大豆春秋齊侯來獻戎捷穀梁傳曰戎菽也管子亦云北伐山戎出冬蔥及戎菽布之天下戎胡俱夷名故以戎菽為胡豆也

### 麻

有二種曰胡麻曰白麻胡麻可飯白麻可壓油土人亦以之薦茶筆談曰胡麻直今油麻耳中國之麻謂



之大麻張騫始自大宛得其種亦謂之麻故以胡麻別之則是自漢始來中夏矣然本草已載胡麻未知孰是陶隱居注本草胡麻入穀中最良本生大宛故名胡麻

### 布帛

## 羅

潤州土貢衫羅見唐地志貢大花羅見宋王岩叟奏疏 互見土貢門

## 綾

潤州土貢水紋魚口繡葉花紋等綾見唐地理志并元和郡縣圖志又貢方紋綾水紋綾見寰宇記今所織者名杜綾又搃綿為縷織之名綿綾用白絲織之名大綾 互見土貢門

## 絹

潤州貢絹見寰宇記今土人所織者名土絹

## 至順鎮江志

### 卷四

三

按周禮內司服注素紗者今之白縛也縛音絹說文絹繪如麥稍一名鮮支廣雅曰鮮支絹也 互見土貢門

## 紗

出丹徒縣洞仙高平二鄉浙人貴重之

按漢建初二年詔齊相省冰紈方空縠吹綸絮注紈素也冰言色鮮潔如冰縠紗也方空紗薄如空也吹者言吹噓所成亦紗也 唐書音訓輕容無花薄紗

## 紬

土人所織名南紬 搃綿為之名綿紬

按急就章注絡今之生縑也一日今之綿紬是也 縑一作纏始移反說文纏粗緒也廣韻纏繪似布

## 布



土貢火麻布見唐地理志賦納貯布見元和郡縣圖志以苧皮兼絲緝而成者謂之絲布舊志謂金壇之絲布苧布皆女冠所織世稱精麗近土人亦有織木綿為布者文選蜀都賦布有橦華注蜀都有橦樹其華柔可織布豈謂是與

### 飲食

### 酒

晉桓溫云北府酒可飲謝元度曾蒞此鎮與親舊書稱京口酒美可飲輿地志京口出酒號曰京清埒于曲阿又云曲阿出名酒淳烈後湖水所釀也故朱柳詩暫入新豐市猶聞舊酒香梁武帝與駕東行記有覆船山酒罌山高驪山傳云昔高驪女來此東海神乘船致酒聘之在不肯海神撥船覆酒流入曲阿故酒美宋州郡戎司總所酒名不一若錦波清心坐嘯介壽燕凱百禮共軍愛山是以堂得名若京口還京秦潭浮玉第一江山是以地得名若真珠中冷不老是以泉得名見嘉定志

### 至順鎮江志

### 卷四

四

### 麵

麩麥為之南北商販多出于此

### 麵

土人成造精粗不一貨于他郡多有達京師者

### 醬

鄰境多仰給于此急就章注醬之為言將也食之有醬如軍之須將取其率領進導之也

### 鱒鮓

潤州土貢鱒鮓見唐地理志宋紹興中韓世忠嘗以為獻高宗卻之其色瑩白如玉故名玉版鮓土人以之饋遠互見土貢門

### 牛乳



出丹陽者爲佳舊志稱其凝白如酥

酢

出金壇極醖且美今以充貢釋名醖苦酒卽今之醋也魏名臣奏曰今官販苦酒與百姓爭錐刀之利按說文酢醖也倉故切醋客酌主人也在各切今俗酢醋互用誤耳互見土貢門

青飀飯

出茅山唐張賁以青飀飯分送皮日休陸魯望有詩云誰屑瓊瑤似青飀舊傳名品出華陽皮日休和云分泉過屋青春稻自注此飯以青龍稻造之見潤州類集

餅餌

其名有寬椒側厚緩帶之別又有名金花者出金壇可以饋遠

器用

至順鎮江志

卷四

五

鐵器

作溫器燒器等物以錫鍍之其色如銀而耐久可用他郡稱之

銅器

潤州貢伏牛山銅器見唐地理志今無之互見土貢門

火石

出丹徒圖山縣之山多土而此山獨石遠望巉岩間有紋石如瑪瑙擊之火生人多取以爲用

石墨

茅山記費長房遇壺公得其術寓茅山之東書符救人有功一日出山傾視水澗中其石變色因號石墨至今取以書符

茅山石



次玉有瑕可以爲器  
豈所謂砒砢者耶

### 香

黃連香出茅山以黃連樹脂皮爲之焚之  
可辟淫氣又有樺木亦可爲香出近地

### 柳箕

柳箕可用見祥  
符圖經今無之

花華而不實者彙聚于此其有  
實者則入果類不重出也

### 杜鵑

在鶴林寺高丈餘每至春月開花爛漫傾城士女游  
賞寺僧相傳唐貞元中有外國僧自天台鉢盂中以  
藥養其根來種之每春末開時或窺二女子共游花  
下俗傳花神也其後有殷七七者名文祥又名道筌  
周寶舊于長安中識之及寶自涇原移鎮浙西七七  
忽到寶師敬益甚一日謂七七曰鶴林之花天下奇

### 至順鎮江志

### 卷四

六

絕常聞能開非時花今重九將近能開此以副佳節  
乎七七曰可乃前二日往花所中夜聞女子來曰妾  
爲上帝司此花今與道者開之然此不久當歸闔苑  
矣晨起寺僧忽訝花漸破藥九日盛開如春寶驚異  
燕賞累日後因兵火焚寺根株不存  
信乎其真歸闔苑耶 見續仙傳

按樂天東坡詩注并容齋隨筆所載皆云山石榴  
映山紅山躑躅卽此花也宋咸淳八年主僧慶清  
遂以躑躅花補其舊廡功郎光州司戶參軍蘄春  
朱正國作記刻石未幾枯瘁歸附後延祐丙辰里  
人戈道恭家圃有此花乃移植故處蜀郡青陽里  
爲記其略云凡天下事物失易得難失而復得尤  
難潤城古竹院相傳有奇卉由唐末失去近得之  
比里戈氏復歸之寺人謂是華託根禪寂幽負之  
境絕迹塵囂汗陋之域固有以見異于世今失之  
數百載而幸得之且復歸于舊而不失其所以貴  
竊觀人之有生內本外末有所不容失者失之或  
不以爲異而又不知勉力以求復之則是華之復  
可不謂難乎觀  
者宜有感矣



玉藥

在招隱山唐李衛公寄沈大夫詩云玉藥天中樹金  
閨昔共窺落英閑舞雪密葉乍低帷舊賞煙霄遠前  
歡歲月移今來想顏色還是憶瓊枝注此花吳人不  
識因子賞翫乃得此名內苑沈大夫閣前有此花每  
花落空中回旋久之方集庭砌大夫草詔之暇嘗邀  
子同賞宋蔡寬夫詩話載此詩云碑今裂為四段在  
通判廳中而招隱無復此花矣按周文忠公必大玉  
藥辯證跋語云唐人甚重玉藥故唐昌觀有之集賢  
院有之翰林院有之皆非凡境也往因親舊自鎮江  
招隱來遠致一本條蔓如茶蘼冬凋春茂柘葉紫莖  
再歲始著花久當成樹花苞初甚微經月漸大暮春  
方出入鬚如冰絲上綴金粟花心復有碧筍狀類瞻  
瓶其中別抽一英出眾鬚上散為十餘葉猶刻玉然  
玉藥之名乃在于此羣芳所未有也宋子京筆記維  
揚后土廟有花色正白日玉藥劉原父移瓊花詩序  
云瓊花別號八仙花或謂李衛公所賦玉藥即此宋  
敏求春明退朝錄后土廟瓊花或云自唐所植即衛  
公所謂玉藥三公博洽無比不知何故疑為瓊花惟

至順鎮江志

卷四

劉夢得雪藥瓊絲之句最為中的又曾端伯高齋詩  
話廬陵段謙叔有楊汝士與白二十二帖云唐昌玉  
藥以少故見貴耳自來江南山山有之士人取以染  
事不甚惜也則知場花為玉藥無疑洪景盧容齋隨  
筆玉藥今場花又名米囊黃魯直易為山礬者在江  
東彌山亘野而唐昌所產至于神女下遊折花而去  
以踐玉峯之期是不特土俗罕見雖神仙亦不識也  
止因好事者偽作唐人帖故二公皆信之所謂信耳  
而不信目也

今按蔡寬夫謂招隱無復此花然近年乾元萬壽  
宮住持余孟實自招隱山移此花植于宮前花圃  
時紫泉馬堯復有詩里人龔理子中次其韻曰山  
水窟宅江之南搜奇抉勝味飽諳朱方招隱最超  
絕樹作玉藥珠濺潭高花密葉互掩映柔柯老幹  
相撐擔叢林何事著此種香嚴鼻觀禪獨參遶之  
百匝足未止讚以千偈言尤甘空山變滅異今昔  
枯松折竹徒侵攬彝器遷移鼎鐘去誰復別識缶  
與鏤溫澤纈栗夙比德棄使不見情難堪東皇移  
根謹呵護玉立殿陸清光涵藥宮仙人委長佩青



善一尺瑤華簪長齋三時晝方靜凍雨一洗春正  
酣眼中突兀現妙品繚以閣道棲神菴瞿曇老聃  
共空寂出彼入此容何慙人間多事到詩酒甚欲  
忍口牢三緘荒城解后此粲者換飲卻肯拚春衫  
時當晴埃吹野馬採掇沃若眠吳蠶清尊如空雜  
花亞落日欲墜西山銜流年過眼急如電留此一  
賞容非貪卽今芳事已塵土我輩政爾多空談然則招隱未嘗無此花也

### 玉蘭

出丹徒馬迹山紫府觀遇者以爲瑞其花表裏瑩白  
其色如玉其香如蘭不根而植不蓓而花或自東生  
或自西出然不常有每遇開時多于暮春宋淳祐間  
此花忽開郡守李迪作詩歌之見咸淳志陳輔之有  
玉蘭詩二首見京口集乃爲丹陽疑禧觀作近年茅  
山溪谷中亦往往有之或開于秋冬間山志載其蘭  
芽刻玉氣甚幽亦芝英之別種蓋其產無定在其開  
無定時真山林間之靈植也

### 牡丹

### 至順鎮江志

### 卷四

八

亭館中多種之其品不一然單葉而色紫者居多枝  
幹特盛王彥照鶴林故居干葉牡丹號淺羅紅有詩  
見京口集唐人謂之木芍藥

### 芍藥

土人謂之草牡丹

按劉貢父芍藥譜云天下名花洛陽牡丹廣陵芍  
藥爲相侔埒其名品甚眾京口于廣陵爲近大抵  
治花之法又與廣陵相似故比他處特盛焉府治  
內舊有芍藥亭譜中有茅山冠子紫樓子茅山紅  
三種

### 海棠

有二種有多葉者有五出者初極紅及開則漸成纈  
暈落則若宿妝殘粉矣又有一種柔條長蒂垂英向  
下而色淺紅者俗謂之垂絲海棠



巖桂

一名木犀紅者名丹桂又有黃白二色氣尤清馥有一歲開四次者有一秋開二三次者但著藥不繁耳

山茶

紅白二種有千葉者柯葉四時常青隆冬盛開不畏霜雪

山丹

山茶之別種形色甚相類但華萼極大亦有紅白二種紅者謂之日丹白者謂之月丹

蠟梅

木身與葉如蒲藿香氣似梅而加郁烈華亦五出類刻蠟而成又與梅開同時故名蠟梅實非梅也以花瓣之肥大者為貴細薄如蠅翅者為下

紫薇

至順鎮江志

卷四

九

樹高而膚薄爪之則動搖如怕痒然故東坡詩注云紫薇花小而叢其色紫俗所謂怕痒花也今土人呼為不耐痒唐省禁中多植之又名百日紅謂其花自夏徂秋開落僅百日也楊誠齋詩云誰道花無紅十日紫薇常放半年花

紫荊

花色紫而叢生花謝後始生葉

辛夷

木叢生葉似柿而長正二月開花夏秋再開初生如筆狀故又名木筆本草陳藏器云北人呼為木筆南人呼為迎春

木槿

一名日及即詩所謂舜華也其花淡紅如葵而小朝榮夕悴人家多種以抵籬落爾雅椴木槿櫬木槿注



別二名也陸璣草木疏  
齊魯之間謂之王蒸

### 八仙

狀如瓊花八蝶簇一心又有小蝶簇聚如碧王者曰  
玉胡蝶前人謂此花大率類瓊花而不同有三瓊花  
大而瓣厚其色微黃葉柔而瑩澤葉與花  
平而香此八仙之無有也識者自能辨之

### 玫瑰

紅白二種  
一名徘徊

按說文玫瑰火齊也今南方出火珠史記司馬相  
如傳注玫瑰石珠也異物志火齊如雲母一日石  
之美者說文通釋火齊象珠赤色  
起之層層各異花色似之故名

### 梔子

本草圖經云白花皆六出甚芬香俗說卽西域簪  
蔔也山梔子一名越桃實圓小堪入藥其大而長者

### 至順鎮江志

#### 卷四

十

止可作染色其葉經冬不凋故杜  
詩云紅取風霜實青看雨露柯

### 棠

叢生莖心如通草高數尺許花黃色多葉  
離落間多種之非詩所謂維常之華也歟

### 凌霄

附木蔓生其花上露有毒凌晨  
仰視或滴入眼中令人喪明

### 木香

黃白二種花叢生白  
而紫心者更香也

### 酴醾

白酒名酴醾世以此花顏色似之故取以名採之可  
爲枕囊故黃魯直詩云名字因壺酒風流付枕幃

### 金沙



花萼有大小二種大者開遲而色鮮明小者開早而色殷重

### 月季

類金沙而叢低每月花一開一名長春又名月月紅

### 薔薇

有紅紫黃數色枝條間有刺又有野薔薇香亦清遠

### 錦帶

條長花密爛若錦帶故名王元之謂其得于海州山谷間易名曰海仙作詩云錦帶為名卑且俗為君呼

作海仙花

### 瑞香

叢低花繁香甚烈故詩人擬之錦薰籠蘇文忠公有刁景純家賞瑞香憶先朝侍宴詩見京口集

### 至順鎮江志

#### 卷四

七

### 結香

枝柔可結未葉先花色黃白微香即丁香也李商隱詩云芭蕉不展丁香結同向東風各自愁

### 素馨

龜山志云舊名那悉茗昔劉王有侍女名素馨其冢上生此花因以得名閩中人以之薰香然此土之所產色黃無香而閩中所產者則花葉稍大色白而香但枝葉甚相類當別是一種也

### 迎春

類素馨晏同叔詩云淺豔侔鶯羽纖條結兔絲

### 罌粟

又名御米花紅白二色有千葉單葉二種一名象穀一名米囊本草謂之罌子粟蓋以其狀如瓶罌中有粟可食亦可作腐張祐丹陽間居雜題詩云碧抽書帶草紅結米囊花



麗春

花類罌粟四出葉端如錦稜跗上有軟刺色媚而香土人呼為百般嬌

山礬

雜志一名鄭花一名七里香黃魯直山礬花序云江南野中有一種小白花木高數尺春開極香野人謂之鄭花王荆公嘗欲作詩而陋其名予請名曰山礬謂其可以染也按周益公玉藥花辯證跋語引南史劉杳傳云杳在任昉坐有人餉昉栲酒而作椹字昉問杳此字是否答曰葛洪字苑作木旁若栲音陣予嘗得醞法芳烈異常山谷似不以杳傳為據而徇俗訛栲作鄭而江南鄉音又呼鄭為場復疑未安于是創山礬之名  
場音杖梗切

玉繡毬

一帶而眾花攢聚圓白如流蘇故名佩韋  
集有賦湯提刑南園玉繡毬花詩二首

至順鎮江志

卷四

粉團兒

叢高數尺花如月季  
朱粉適均色極嫵媚

佛見笑

大類粉團謂使佛見之亦  
欣然而笑甚言其可愛也

真珠

花細白叢開狀若  
珠璣一名玉屑

木芙蓉

草木記產于陸者曰木  
芙蓉產于水曰草芙蓉

按楚辭搴芙蓉兮木末特假物為喻言芙蓉在水而求之木末不可得也二花顏色相類後人借此語以名之爾蘇子瞻以其九月霜降時開者易名曰拒霜然亦有夏秋二種之分也



蘭

高資山谷中多有之紫莖赤節綠葉光潤左氏傳所謂有國香而人服媚之者記佩悅茝蘭蓋古人以此為佩也

蕙

蘭之屬本草云薰草也亦產山谷中黃魯直云一榦一花而香有餘者蘭一榦五七花而香不足者蕙也

菊

舊譜名品甚多今人巧于種植花亦屢變其高有丈許而花大如杯者昔所未見月令翰有黃華今紅紫白黑不可枚舉要皆以黃為正爾雅鞠治牆注今之秋華菊又一種冬深始開謂之臘菊

葵

爾雅肩戎葵注華如木槿今蜀葵也疏戎蜀皆其所自草木記云葵有數種一取其花名蜀葵一取其葉

至順鎮江志

卷四

三

名蒲葵一取其食名葵菜又花小而紫色名錦葵惟黃葵秋芳尤雅潔可愛

蓀

李德裕平泉記芳蓀生茅山東溪陶隱居稱蓀紫色生淺水中相傳女仙人錢妙真所種又德裕寄茅山孫鍊師詩云石上溪蓀發紫茸又有詠茅山芳蓀詩云楚客重蘭蓀遺芳今未歇葉依清淺水花照暄妍節紫豔映渠鮮輕香含露發離居若有贈暫與幽人折

水仙

本自南方來冬深始芳倘非培植之勤則不著花蓋此近淮氣候稍寒故也有千葉者有單葉者楊誠齋云世以水仙為金釵銀臺蓋單葉者耳至千葉水仙則其花下輕黃而上淡白如染與酒杯之狀殊不相似安得以俗名辱之要之單葉者當命以舊千葉者乃真水仙云

玉簪



以形似得名其氣清馥一名白鶴又一種名紫鶴花葉甚類而小色淺而紫初夜先開

### 雞冠

亦以形似得名有紅白二種佛書謂之波羅奢花

### 萱草

花有千葉單葉色有紅黃二種詩作諼草嵇康養生論萱草忘憂本草根名鹿葱花名宜男

### 金燈

紅黃二種花攢莖頂如燈吐燄本草謂之山慈菘

### 金錢

花色深黃圓如赤仄生堦砌間晝開夜落酉陽雜俎曰毗戶沙一名日中金錢花本出外國梁大同二年進來中土

## 至順鎮江志

### 卷四

十四

### 金鳳

一名鳳仙俗呼鳳兒花有紅白紫數種又有川鳳兒與此稍異

### 石竹

一名錦竹叢生不及尺許爛如錦纈李白詩石竹繡羅衣

### 水紅

詩隰有游龍毛云龍紅草也陸璣云一名馬蓼葉大而白色生水澤中高丈許爾雅紅龍古注俗呼紅草為龍鼓語轉耳

### 翦金

色甚黃葉分數歧渾類翦刻

### 滴滴金



一名滴露花  
謝著地即生

### 牽牛

籬落間蔓生如鼓子花而稍大作碧色本草  
補注曰始出田野人牽牛易藥故以名之

### 玉胡蝶

叢生闊葉花類  
胡蝶狀故名

### 碧蟬

其花與玉胡蝶相  
類而青碧可愛

### 密友

紅黃千葉歐陽公  
牡丹記作燠字

### 百合

### 至順鎮江志

### 卷四

十五

紅白色根如蒜疊生數十種可蒸食甚甘又一種名  
川百合杏黃色上有洒墨點花鬚翹起鬚端紫粒搖  
搖若懸綴

### 黃雀兒

土人用  
編籬落

### 郁李

樹小而花繁詩常棣之華陸璣云奧李也一名雀梅  
亦名車下李所在山皆有其華或白或赤六月中熟  
大如李子可食今此花淡  
紅色而不實恐非常棣

### 山木瓜

劉言史有王侍御莊看山木瓜花詩云裊露凝氛紫  
豔新千般婉娜不勝春年年此樹花開日出盡丹陽  
郭裡人見  
潤州類集



寶相

枝繁花密  
色類郁李

紫笑

舊丹徒縣圃有此花春時開最可愛  
亭名紫香取此 見咸淳志

金梅

黃花五出  
初夜時開

笑靨

枝葉柔細花繁而小  
盛開之際如雪封條

天燭

花如粟粒結子  
甚紅深冬可翫

至順鎮江志

卷四

六

果

梅

有白有紅皆五出其實有圓消梅  
蕊管消梅金定梅  
苦梅未熟曰青梅熟曰黃梅  
惟干葉者花而不實

杏

花類紅梅而豐豔未開時  
尤可翫實有大小兩種

桃

花極穠豔又有緋白二種而白者極少  
其實之小而先熟者曰御愛桃  
曰紅穰離核桃品之佳者曰金桃  
餅子桃細葉紅桃水蜜桃油桃  
黑黃曰昆侖桃曰毛桃者品之下也  
唐會要貞觀九年十一月康國獻金  
桃詔令植于苑又云康國獻黃桃  
大如鶩卵其色如金然則唐世始傳  
金桃也通典作康居云貞觀二十  
一年茅山燕洞有碧桃見詩話



李

花最繁丹徒縣東南大港多種之其實之品目亦夥  
顆大而色朱或紫者有相公金沙紫灰水菘等稱抗  
條其最下者白李出茅山展仙人遺種見茅山志又  
有名早傳根者俗呼為麥熟李實小而脆本草云京  
口有麥熟李爾雅瘞接慮李郭云今  
之麥李邢疏云與麥同熟故因名

櫻桃

花繁色頗淡薄實最先熟紅者曰朱櫻正黃明者曰  
臈櫻爾雅櫻荆桃注今櫻桃廣雅云櫻桃含桃也月  
令羞以含桃呂氏春秋曰  
以鶯嘗含其子故名櫻桃

枇杷

冬華夏實味甘多核上  
林賦云盧橘夏熟是也

來禽

至順鎮江志

卷四

七

花如海棠微覺淺淡俗呼林  
檜劉楨京口記南國多林檜

石榴

有紅白二種亦有千葉者一名丹若其實有甜酢西  
陽雜俎甜者為天漿博物志陸機與弟雲書曰張騫  
為漢使外國十八年得塗林安  
石榴種蓋自西域來中國也

蒲萄

本出大夏漢西域傳曰漢使采蒲萄苜蓿種歸是也  
雜志云一名馬乳有青紫二種形亦有圓銳之異青  
者名水晶蒲萄其味尤勝本草云汁可釀酒今  
本路所貢舍利別即其所造也 詳見土貢門

木瓜

實小而酢人家園館中或種之比宣城則為劣矣爾  
雅楸木瓜疏木瓜一名楸實如小瓜酢可食詩衛風  
投我以木  
瓜是也



銀杏

葉類鴨腳樹身極高大俗傳三十年方結子然又有雄雌雌者實而雄者不實皮肉不可食可食者核耳

胡桃

一名羌桃本出西域亦張騫所致然亦其核可食土產者殼堅而仁少比北來者不侔矣

梨

花極清麗實曰快果有磬口梨水密梨消梨青梨芝蔴梨糜梨

柿

大者曰方柿就樹熟者曰樹頭紅有以火焔而熟者曰烘柿以石灰湯燻而熟者曰燻柿小而圓者曰火珠柿者曰牛爛一種生山野中僅如拇指大不可食釀其藩可為漆

棗

至順鎮江志

卷四

六

有數種實大味美而色瑩白者名牙棗銳其兩端者名梭棗小而圓者名羊矢棗叢生山逕間實小而酢者名酸棗爾雅檇白棗槭酸棗遵羊棗

栗

有社栗獨顆栗茅栗詩樹之榛栗陸璣云栗五方皆有之吳越被城表裏皆栗房當心一子謂之栗楔

橙

脆橙錦橙可食一種徑三寸許理麤而皮厚者名木橙不可食或絡而流蘇或置之几席賞其香韻而已又名香欒淮南子云食之則美嗅之則香

西瓜

本自西羌來故名西瓜其形有圓有橢子有紅黑黃三種剖之子稀而肌理若卷雲者名雲頭瓜味尤甘

甜瓜



種有大小小而黃者曰金瓜白者曰銀瓜碧者曰香瓜又名一握青其大而青質斑紋者曰華瓜豈陸璣所謂黃瓜白縛小青大斑之類乎

### 榧櫛

本草圖經云木葉花實酷類木瓜大而黃欲辨之看蒂間別有重蒂如乳者為木瓜無此者為榧櫛也又榧櫛注云似櫛子而小圖經曰榧櫛大抵類櫛但膚慢多毛味尤甘今此土所產者不過如桃杏大與木瓜殊不相亂乍食酢澁味之轉甘豈所謂榧櫛者與禮記內則鄭注相梨之不臧者陶隱居云爾雅櫛梨曰鑽之鄭公不識櫛故云然古亦以櫛為果今則不入例爾邢昺疏鑽之謂一一鑽看其蟲孔

### 棠球

生山野間有紅黃二色土人謂山裏果子一名毛櫛子一名小石榴

### 無花果

不花而實其甘如飴

## 至順鎮江志

### 卷四

### 蓮

花有紅有白紅者實佳白者藕勝又有重臺者又或有雙頭者人以為瑞舊傳丹陽練湖蓮花開邑人必有位執政者宋元祐初上下兩湖蓮花盛開是歲王存拜丞轄紹興壬子初夏又開是歲翟汝文入參大政越八載己未章復為宰日亦開半湖雖邑人無登二府其後復為簽書淳祐甲辰乙巳之間又有大開其後金壇丁大全亦拜相唐李德裕有白芙蓉賦序曰金陵城西池有白芙蓉素萼盈尺皎如霜雪江南梅雨麥秋之後風景甚清漾舟淥潭不覺隆暑與佳客泛翫終夕忘疲古人惟賦紅葉未有斯作因以抒思庶得其仿髯焉蓋金陵謂潤州城西淥潭即今放生池也又有重臺芙蓉賦其序云吳興郡南白蘋亭有重臺芙蓉生於長城章后舊居之側移植蘋洲至今茂盛余頃歲徙根于金陵桂亭奇秀芬芳非世間之物因為此賦以代美人託意焉賦有曰紅葩偉而煜煜翠葉小而田田注此花大于常蓮而葉小于眾



藕  
荷又曰此花無寔徒根又不三數年則絕故人間罕有至元間前潮倅湯亞卿居京口其園池中蓮開雙頭時名公皆有詩佩韋集有雙蓮詩序爾雅荷芙蓉渠其莖茄其葉葭其本密其華菡萏其實蓮謂房也本草云蓮其葉名荷其花未發之時者爲菡萏已發者爲芙蓉

菱  
見上注土產以金壇爲勝夏間花開時所取白花下藕味尤甘脆而美勝于常時也

芡  
卽芡也離騷注菱生水中葉浮水上花黃白色實紫色兩頭銳爾雅菱蕨攬注菱今水中芡一名蕨攬字林云楚人名菱曰芡可食國語曰屈到嗜芡俗云菱四角曰芡又謂之水栗

芡  
一名鴻頭一名雁頭一名雞頭皆取其苞之形似耳仇池筆談云菱寒芡煖者菱開花背日芡開花向日也  
至順鎮江志 卷四 三

芡菇  
一名燕尾草以其葉有楹也根如芋子或名田酥或名白地栗

荸薺  
一名鳧茈爾雅芡芡注云生下田苗似龍鬚而細根如指頭大黑色可食芡音尸了切本草謂之烏芋又名地栗可作粉

蔬

菘

秋末晚菘菜之美者也白根青葉高二尺許配鹽菹之可以禦冬又有冬種而春茂者名苔心其蕪亦高一二尺肥美可茹差小者名白菜又有夏菘菜尤小土人避都統夏菘諱呼曰蔓菁然蔓菁與菘本皆一



也類

按周禮菁菹注蔓菁也詩采葑箋云蔓菁之類上  
下可食陸璣云葑蕪菁也郭璞云今菘菜也江南  
有菘江北有蔓菁相似而異爾雅翼云蔓菁春食  
苗夏食心秋冬食根此正謂江北之所產張文潛  
詩云蕪菁至南多變菘是也呂氏春秋菜之美者  
具區之菁此地與具區相邇則菜之美有自來矣

芥

有青紫二種紫者尤辛內則芥醬注芥辛菜方言蕪  
菁趙魏之郊謂之大芥其小者謂之辛芥或謂幽芥

菠薐

菠薐本是頗陵語訛爾種自頗陵國來見劉禹錫嘉  
話又唐西域傳貞觀十一年尼婆羅遣使入獻菠薐  
菜土人但呼為波菜

蒿

至順鎮江志

卷四

三

有苧蒿萑蒿二種苧蒿家園多種之萑蒿生江皋水  
澤中本草菜部有邪蒿苧蒿而草部又有白蒿青蒿  
皆可食要之非一類也

薺

乃野生詩其甘如薺急就章注薺甘菜也本  
草陶注薺類多此是可食者葉作菹根亦佳

韭

韭之言久也一種則久生見急就章注夏小正曰正  
月圃有韭詩四之日祭韭是蓋正二月間乍出肥嫩  
其味尤美曲禮韭曰豐本廣雅云韭其華  
謂之菁其性溫暖故本草謂草鍾乳也

胡葵

葷菜土人以之薦茶廣雅云張騫使西域得大  
蒜名胡葵以自胡中來故名今俗呼為元葵

蕨



薤

生山石間芽如握拳色紫葉稍舒則不可食爾雅蕨  
驚注初生無葉可食搜神記曰郗鑿鎮丹徒二月出  
獵有甲士折一枝食之覺心中淡淡成病後吐一  
小蛇懸之屋前漸乾成蕨明此物不可生食也

葷菜有赤白二種似韭而葉潤多白少實爾雅一名  
鴻薺本草謂之菜芝少儀為君子擇葱薤則絕其本  
末

葱

有數種有實而秧種者謂之青葱無實而分種者謂  
之科葱抽莖高二尺許歧生而作花者謂之樓子葱  
爾雅青謂之葱本白而未青急  
就章注葱青白雜色之名也

科方去聲廣韻滋生也

蒿苳

至順鎮江志

卷四

三

有早晚二種中抽莖如筍故土人  
謂之蒿筍遜齋閑覽云本出高國

苦蕒

味苦可生食廣韻江東呼為  
苦蕒吳人呼為苦蘆音苳

蒼蓬

味甘而滑又名甜菜本草  
莖灰淋汁洗衣白如玉色

蘿蔔

出金壇丹陽者肥大而脆美爾雅菜蘆菹注云菹宜  
為菹蔬紫花菹也俗呼溫菹似蕪菁大根一名菜俗  
呼苞菜一名蘆菹今謂之蘿蔔是也本草謂之萊菹  
蘆音蘿菹蒲北切菹音突土人至今呼為菜子又有  
一種名胡蘿蔔葉細如蒿  
根長而小微有葷氣故名

莫



生菜  
有家莧有野莧野莧即本草所謂人莧家莧則有赤白二種又名馬齒莧亦野生近人多採之以充蔬茹

菜  
有二種葉多者謂之盤生極脆嫩不勝烹瀾止可生茹故以生名之土人用薦春盤杜詩春日春盤細生

薄荷

或書作菝葜有兩種謂之龍腦薄荷者為佳土人以和蔗糖食之

香菜

酷似薄荷土人採其葉以配黃瓜食之香美

胡蒜

葷菜也本草胡大蒜小蒜城西有蒜山寰宇記山生澤蒜因以為名爾雅蒿山蒜廣韻張騫使西域得大

至順鎮江志

卷四

三

蒜胡荽以自胡中來故名胡蒜說文  
離小蒜也音煩字書離百合蒜也

冬瓜

大如斗長二三尺許皮厚而有毛初生正青綠經霜則白如塗粉可藏蓄經年本草白瓜子即冬瓜仁廣

雅一名地芝

菜瓜

又名梢瓜  
可生食

黃瓜

有白黃二種本草胡瓜黃色  
北人亦呼為黃瓜因石勒諱

瓠

有圓長二種而此土所產皆圓味甘詩瓠犀爾雅棲  
瓣注瓠中瓣也張倉肥白如瓠又一種名瓢又名葫



蘆不可食

茄

有紫白二種本草名落蘇西陽雜俎名昆侖瓜

芋

有紫白二種紫芋出茅山本草圖經云可當糧食以度飢年左思三都賦所謂餌蹲鴟之沃則以為濟世陽九是也

葦

生山野間亦有數種惟茅山玉葦為勝

山花菜

生巖石間及嫩時採長三四寸紅瑩可愛味辛而爽或云即防風苗

至順鎮江志

卷四

二十六

葵

苗葉可作菜本草葵葉為百菜主急就章注葵衛足之菜詩七月烹葵此之謂也

蓼

辛菜見說文然土人但以之作麩不以供蔬茹

菱白

一名菰首人家池塘間有之中作墨點比他處為劣

山藥

即薯蕷秦楚名玉延鄭越名土藷紫莖蔓生葉如牽牛白花結實如懸鈴茅山有一種形如手掌名佛掌薯

黃獨



出茅山莖蔓花實絕類山藥葉大而稍圓根如芋而有鬚味微苦而爽杜少陵詩黃獨無苗山雪盛

### 甘露子

莖葉如薄荷而纖弱根狀如蠶土人相傳種時不欲多人知相取時不欲人聞聲聞人聲則所獲者少也

### 蘇

葉下紫色而香俗呼紫蘇南都賦蘇葳紫薑拂撒羶腥內則注香蘇荏之屬方言周鄭謂之公蕢沅湘謂之善音轄其小者謂之釀菜說文通釋荏白蘇也荏荏紫蘇也

### 馬藍

紫微似菠薐見廣雅郊野多有之而土人不食

### 甘菊

葉香可茹土人採以薦茶

### 至順鎮江志

### 卷四

三

### 藥

### 芝

出茅山太元內傳句曲山有神芝五種一曰龍仙芝二曰參成芝三曰燕胎芝四曰夜光洞草五曰白菘玉芝又有熒火芝真誥良常山有熒火芝得食之心孔明可夜書又有九莖紫菌琅葛芝見茅山志

### 石馬乳

出茅山本草云有茅山乳者其山土石相雜偏生茅草以津相滋乳色稍黑而滑潤謂之茅山乳乳性微寒

### 石腦

出茅山本草一名石胎餅隱居云亦鍾乳類形如會青白黑色易破今茅山有志錄君受言出方山北穴下繁陽子姜伯真昔嘗取服



禹餘糧

出茅山本草茅山甚有好者狀如牛黃重重甲錯其佳處乃紫色泯泯如麩嚼之無糝然用之宜細研以水淘取汁澄之勿令有沙土也隱居云茅山鑿地得之極精好乃有紫花靡靡仙經服用之又見茅山志

南燭

出三茅四平山中茅山志清虛真人內傳曰其樹似木而葉似草故號南燭草本一名猴菽草一名男續一名維那木之王也許真人曰方山大猴菽草異佳葉乃大吳越間亦呼染菽登真隱訣云三茅四平山乃不多而樹大其子如茱萸八九月熟酸美可食葉不相對似茗而圓厚味小酢冬夏常青枝莖微紫大樹亦高四五丈而甚脆易摧折沈存中良方所謂卽南天燭非也又見于本草

朮

至順鎮江志

卷四

三

出茅山有赤白二種本草隱居曰出茅山者為勝圖經曰取生朮去土水浸再三煎如飴糖酒調飲之更善今茅山所製朮煎是此法也隱居又云白朮少膏可作丸散赤朮多膏可作煎用然則赤朮乃蒼朮耳

芍藥

有赤白二種本草陶云茅山者最好白而長大

黃精

出茅山九蒸九暴服之駐顏陶隱居云為仙經所貴根葉花實皆可餌服

菖蒲

出茅山潭中一寸十二節本草別錄云二浙人家以瓦石器種之旦暮易水則茂水濁及有泥滓則萎近方多稱用石菖蒲必此類也茅山燕洞有紫菖蒲見詩話

何首烏



本名交藤因何首烏服而得名首烏之祖名田兒生而闍弱服此藥百日舊疾皆愈十年而生數男後改名能嗣又與其子庭服皆壽百六十歲首烏服之亦年百三十歲唐元和僧文像遇茅山老人傳其事李翱因著方錄云見本草圖經

附子

出茅山名茅附比蜀產者實小而氣劣性大熱去溼

烏頭

同上

芎藭

出茅山者謂之芎芎

貝母

至順鎮江志

卷四

七

本草圖經云鄭蔡潤滁州皆有之二月生苗莖葉俱青葉如喬麥葉七月開碧綠色花形如鼓子花八月採根根有瓣子黃白色如聚貝子故名

白蘚

本草圖經云滁州潤州有之莖葉如槐四月開花淡紫色采根用

白薇

本草圖經云滁潤亦有之莖葉俱青類柳葉六七月開紅花採其根用

積雪草

本草圖經云莖細而勁蔓延溪澗側葉圓如錢一名地錢草一名連錢草丹陽郡極多

薺芎

本草圖經云根苗都似人參而葉小異根似桔梗而但無心潤州尤多人家收以為果菜或作脯噉味甚



甘美

翦草

本草出

潤州

連翹

本草圖經云生澤潤淄充等州有大翹小翹二種

羊躑躅

本草出

潤州

劉寄奴

莖似艾蒿葉似柳實似黍而細一莖上有數穗互生宋高祖劉裕微時伐荻見大蛇射之傷明日復至聞杵臼聲覘見童子于榛中搗藥問故答曰我王為劉寄奴所射合藥傅之帝叱之皆散收藥而反遇金瘡

至順鎮江志

卷四

三

傅之良驗寄奴高祖小字微時正居京口也

王不留行

葉似酸漿子似松子本草圖經今浙江並河邊近處皆有之

葛根

本草圖經云今處處有之江浙尤多

蜈蚣

土人呼為百腳赤頭足者良陶曰赤足者多出京口于腐爛積草處得之

水蛭

俗呼為馬蝗歲貢二斤多取之河渠中互見土貢門

茯苓枸杞澤瀉黃連決明桔梗細辛前胡防風元胡



索天南星

茅山志云皆出山中

半夏射干茹蘆茅根大薊小薊

木賊澤蘭瞿麥百部元參丹參苦參沙參白及芫花

鬼箭貫眾商陸地榆括樓芫胡荆芥蒼耳豨薟枳實

茵陳虎杖酸漿香薷牛膝木通漏蘆藜蘆艾馬兜鈴

馬鞭草天門冬麥門冬威靈仙車前子兔絲子生地

黃旋覆花地膚子桑寄生香附子蛇床子地骨皮青

葶子青木香地錦草蓖麻子羊蹄根天花粉金銀藤

鷲鷲藤穀精草地蕭竹山豆根桑白皮牛蒡子吳茱

萸山菜萸龍膽草馬蹄香木饅頭烏虵蠱螻蛄蟬蛻

芫青斑猫無名異

至順鎮江志

卷四

三

以上諸品本草圖經雖不載本郡所出然今皆有之姑敘于此

草

大麻

俗名火麻皮可績布禮記苴麻之有廣是也爾雅一名臬

苧

麻屬詩東門之池可以沤紵是也績其皮可為細布說文縠屬晉樂志自紵舞紵本吳地所出

縠

廣韻臬草土人以為索

芭蕉



葉甚大館亭中多植之卷心中抽榦作花初生大萼如倒垂齒苞有十數層層皆作瓣漸大則花出瓣中紅黃色卽本草所謂紅蕉

### 紫藤

附木而生其花可茹

### 薜荔

蔓生木石垣墻間又一種土人呼為木龍人家亭圃假山中種以為飾卽本草所謂絡石也冬夏常青又有結實者名木蓮一名常青藤一名龍鱗薜荔

### 藍

葉如蓼作畦種之菘藍可為澱蓼藍可染碧又有紅藍土人謂之紅花可染紅博物志張騫所致也

### 莎

### 至順鎮江志

### 卷四

三

葉細而叢生冬夏常青土人謂之塔綠草又謂之繡墩草

### 苔

生古垣墻陰本草在屋曰昔邪在藥曰陟釐散巖竇名石髮鋪空田名垣衣

### 鳳尾

生巖石及墻垣間以形似得名

### 虎耳

生庭砌間紫莖葉間有毛狀若虎耳開花後引鬚長尺許鬚端著地卽生根葉又謂之虎鬚草

### 萬年青

葉長尺許開一二寸冬夏常青

### 絲瓜



蔓生實中有絲如織又名天羅瓜

萍

浮根水上相傳柳花所化爾雅芊萍其大者蘋江東人謂之藻

藻

水草也陸璣云生水底有二種其一種葉如雞蘇莖大如箸長四五尺其一種莖大如釵股葉如蓬蒿謂之聚藻

菱

生圖山江邊莖如大箸長三四尺柔韌可繫物也

蘆

生江浦中大而虛中者謂之蘆細而實中者謂之荻秦詩所謂蒹葭衛詩所謂葭莢皆是也其筍初生時

至順鎮江志

卷四

三

亦可食爾雅其萌蘆注今江東呼蘆筍為蘆音縑

雁來紅

似藿初生葉青紫至秋則葉端漸變紅黃鮮明可愛即所謂後庭花也孫吳會楚望有詩云眩碧成朱被眼瞞分明是葉作花看道人本不知香色只與窗前草一般又一種名映日紅其葉盡赤

竹

慈

叢生冬稚筍在外夏則處中莖圓節疏明皇謂之義竹又名公孫竹又名子母竹又名攢竹

紫

枝幹皆紫色張文潛稱為紫君

斑



青質紫章陳輔之有詠慈雲院斑竹詩  
注慈雲因此謂之斑竹院 見京口集

筍

有四月筍五月筍以  
抽筍之先後得名

水

叢生水際  
宜為篾

侯

節大  
而促

筍

為篾柔韌  
難斷故名

苦

至順鎮江志

卷四

三

以筍味苦故名節間  
長二尺許可為槍

淡

肉薄節間有粉燒  
以取瀝葉可入藥

燕

以燕來時  
抽萌故名

金碧

幹碧而節溝中黃者謂之碧玉間黃金  
幹黃而節溝中碧者謂之黃金間碧玉

象牙

筍味至美而質白  
故名然竹不堪用

篠



散生山野間土人以之充薪用或編籬障用

### 筍

竹萌之總名  
說文竹胎也

### 木

### 松

山中皆有之士人柴薪仰給于此拱把中輒伐之有羅漢松其葉如薤夏侯元宋紹聖丁丑通判潤州有栽松記在長山白龍王廟

### 柏

其葉有圓者有側生者惟側柏葉可入藥用陳輔之有丹陽朝陽寺雙柏詩見京口集朝陽今名普甯茅山崇壽觀太元殿前有經臺柏宋末有道人自咸陽老君說經臺移本植此檀欒翠碧非凡木也見茅山

### 至順鎮江志

### 卷四

三

志

### 檜

柏葉松身晉許長史手植左紐檜在茅山玉晨觀見茅山志郝尊師手植雙檜左一株四幹敷花而不實右一株二幹不花而實在金壇清真觀殿前唐李衛公手植雙檜在北固山火後不存又京口集載梅聖俞刁經臣家綿檜詩云翠色凌寒豈易衰柔條堪結更威狴松生栢葉能相似勁拔緣何不自持

### 楸

俗以立秋日採其葉戴之又以之作浴

### 梓

楸類也爾雅椅梓草木疏曰楸疏理白生子者為梓梓實桐皮曰椅說文椅梓也檟楸也檟楸也然則一名耳



槐

似榿而葉小爾雅榿槐大葉而黑守宮槐葉晝聶宵  
炕注聶合炕張也莊子槐之生入季春五日而兔目  
十日而鼠耳更旬而始規二旬而葉成  
又有身擁腫枝下垂如蓋者名矮槐

桐

有數種實可食爾雅榮桐木注卽梧桐周書時訓清  
明之日桐始華桐不華歲有大寒夏小正三月拂桐  
芭管子五粟五  
沃之上宜桐

杉

爾雅椈一名黏注黏似松生江南本  
草木類而勁直葉附枝生若針刺然

黃楊

歲長三寸遇閏則縮東  
坡所謂厄閏年者是也

至順鎮江志

卷四

三

楓

樹高大葉三角爾雅楓楸楸注似白楊葉圓而  
歧有脂而香說文厚葉弱枝善搖一名楸楸

檀

急就章注堅韌木也  
詩伐檀可以爲車

椿

有香臭二種禹貢杗幹字或作樛左傳  
雍門之櫛集韻櫛通作椿說文無椿字

樗

形類椿詩蔽芾其樗注惡木也本草樗有花者無茨  
有茨者無花急就章注樗似椿而木虛惡唯堪薪燎  
或曰葉脫處有痕  
如樗蒲子故名之

榆



樟

白枌也爾雅注枌榆先生葉卻著茨皮色白詩東門之枌注白榆也採實取仁可以為醬

柳

葉細樹大而氣辛即豫章也說文無樟字

晉地理志山多赤柳故名丹楊又一種枝弱下垂者名垂柳

水楊

葉圓而枝短生水濱

桑

葉可飼蠶有數種有花者葉小而薄

柘

至順鎮江志

卷四

三五

類桑葉小而厚亦可以飼蠶

楮

實可入藥亦名穀樹

朴

類楮皮鱗皴而厚

棟

實可入藥

櫟

似樗而堅土人以充薪實曰櫟爾雅櫟其實棟注有棟彙自裏疏其子房生為棟也

枳



叢生多刺實不堪食俗呼狗橘考工記橘逾淮而北為枳潤雖江南然不宜唐張祐丹陽新居詩架倚薔薇立籬因枳殼編

娑羅

七葉並生故一名七葉樹府治內舊有娑羅亭

冬青

冬夏常青名萬年枝

石楠

經霜葉紅如染

黃荊

葉可染色條可為筆

至順鎮江志

卷四

櫻櫚

木高一二丈傍無枝條葉岐生有皮相重被于四旁每皮一匝為一節又名併櫚花黃白色未出時剖皮得之狀如魚子東坡所謂木魚也

皂莢

類槐而有刺樹極有高大者

榭

與櫟相類亦有實名櫟斗一種小而叢生土人呼為字落以之充薪

畜

牛

水黃二種



羊

山羊毛色多白間亦有黑色褐色者

猪

純黑無白者方言燕朝鮮之間謂之猥關東西謂之彘或謂豕南楚謂豨其子謂之猥吳揚之間謂之猪子

狗

有數種短足者名海狗長毛名獠狗狗眼鼻赤者名獾狗短毛者名鹿尾狗

猫

毛色不一本草謂之家狸佩韋集有義猫說其文曰俞子之居猫之孳乳者三狸而黑者緣墻越屋人竊之夜擊缶呼莫能得遺二子烏烏箱篋間蹣跚不于如有望而弗至余甚憐之忽爛斑類虎紋者即而視

至順鎮江志

卷四

三

悲鳴顧眄脚其一與已之子俱已復如之煦嫗舖乳惟均惟一其白質黑章者感焉亦銜其子就之出入相覆迄于成更相母子見者莫之能辨吁亦異矣夫天地之間至貴者人至賤者物至有識者人至無知者物也往歲里人飼猫每產子輒親啖之余聞之嘗掩耳弗忍聽及讀韓愈氏文說二猫相乳因疑而未之信及今乃親見之豈物之性亦有具人之性者歟然而尺布斗粟之謠既形于漢然箕煮豆叔季之世往往有之是何人而反不獸若也兵燹十年東南黔首半為魚肉一二寡妻穉子依草木幸存者兄弟親戚視之不啻路人飢寒困苦藜不胥顧室廬田園猶有餘者至設陷穽奪而有之抑亦何心哉昔李義府柔而害物史擬之以猫今視斯猫殆有類于世之所謂義士者而豈義府比哉吾因為之說使覽者或愧焉是亦禪風教之壹端也

雞

有大小數種



鵝

金壇縣子鵝肥美特異他處初生無百日即可食羅  
隱京口送楊子蒙東歸詩云東吳逸客樓船後拋擲  
子鵝離京口刁景純懷南徐所居寄二弟詩云京  
口子鵝宜薦俎壻頭醅釀好飛觴 見京口集

鳴

土人罕畜之爾雅疏鳧鶩  
李巡曰野曰鳧家曰鶩

禽

鷹

一歲為黃鷹二歲為鵞鷹  
謂其蒼黃也三歲為蒼鷹

鷓

鷹類西京雜記世傳鷓生三子則一為鷓師  
曠禽經骨曰鷓瞭曰鷓張華注瞭能遠視也

至順鎮江志

卷四

三

鷓

鷓類爾雅晨風鷓陸璣云燕領勾  
喙嚮風搖翅擊鷹鷓燕雀食之

鷓

雄小而雌大土人謂之呀鷓金山之  
東有石山鷓常棲息其上因名鷓山

鷓

似鷓而小  
能擊燕雀

烏

純黑而反哺者名慈烏腹頸白者名燕烏爾雅燕白  
脰烏小爾雅云白項而羣飛者謂之燕烏喙大而聲  
厲者曰老鴉又一種名寒鴉師曠禽經  
慈烏反哺白脰烏不祥巨喙烏善警

鵲



俗呼喜鵲謂喜事將至能先知鳴以報人也淮南子  
鵲知風之所起太陰所建鵲巢鄉而爲戶金壇張恪  
居母喪致白鵲來巢  
見人材門孝友類

鳶

俗呼爲餓老鴟以其善攫也爾雅鳶其飛也翔注謂  
其布翅翱翔曲禮注鳶鳴則將風禽經鳶不擊有貪  
注不善搏擊  
貪于攫肉也

燕

一名元鳥月令仲春之月元鳥至以其色元故謂之  
元鳥又名鴛詩天命元鳥降而生商而緯候皆言簡  
狄吞鴛卵而生契是元鳥又名鴛也又有白者宋志  
元嘉十八年六月白燕產丹徒二十七年五月甲戌  
白燕產京口梁馬樞傳樞隱于茅山有白燕一雙巢  
其庭樹馴狎欄廡時至几案春來秋去幾三十年

雀

至順鎮江志

卷四

三

說文依人小鳥  
也字或作爵

鸛

水鳥也將陰雨則鳴詩鸛鳴于垤禽經伏卵則鸛入  
水注伏卵時數入水冷則暇取礬石周卵以助暖氣  
故方術者以鸛  
巢礬石爲真也

鷗

字亦作漚禽經鷗信鳥也注鷗  
水鳥如鷓鴣而小潮至則翔

鷺

爾雅鷺春鉏注頭翅背上皆有長翰毛今  
江東人取以爲毳毼名之曰白鷺縷也

鷲

土人謂之黃鳥爾雅皇黃鳥陸璣疏黃鳥黃鸝留也  
幽州人謂之黃鷲一名鷓鴣一名商庚一名鷲黃一



名楚雀齊人謂之搏黍嘗以甚熟時來

雉

俗呼野雞爾雅雉類不一有曰江淮而南青質五采皆備成章曰鷓則潤之所產乃鷓雉也漢呂后名雉故呼野雞唐高宗名治小字雉奴故相承諱至今

鳩

其羽斑俗呼斑鳩方言蜀謂之拙鳥禽經鳩拙而安注不善營巢取鳥巢居之雖拙而安處也又一種惟頸間有斑毛者土人呼為鶉鳩即布穀也語訛耳爾雅鳩鳩鶉鶉注今之布穀也江東人呼為穫穀

鴿

土人呼家畜者為鴿鴿毛采不一各有其名又一種野生者名野鴿梁張僧繇吳人潤州興國寺苦鳩鴿棲梁上穢污尊容僧繇乃東壁上畫一鷹西壁上畫一鴿皆側首向簷外看自是鳩鴿等不敢復來 見

至順鎮江志

卷四

罕

太平廣記

鴿鴿

土人呼為喇哥說文似鴿而有幘淮南子寒臯鴿鴿也斷舌可使言語禽經鴿鴿剔舌而語今俗以五月五日者用蒲酒燃其舌則能如百舌語

郭公

身赤而頭尾黑人以其聲為名

百舌

一名反舌月令反舌無聲易通卦驗能反覆其舌隨百鳥之音又名桑遇

鶻鶻

爾雅鶻鶻鶻注似山鶻而小短尾青黑色多聲今江東亦呼為鶻鶻音骨朝左氏傳鶻鶻氏司事也杜



注云鵲鵲也春來  
秋去故爲司事

### 鴉舅

狀如鴉黑色長尾鴉甚畏之故名鴉舅張祜  
丹陽閒居雜興詩落日啼烏舅空林露寄生

### 餓鳥

云自海上來嗑中有砂石如黍粒亦名金剛鑽  
唐元稹和浙西大夫述夢詩云金剛雖透玉

### 竹雞

鳴則泥滑滑蓄之  
久則鳴聲數愈多

### 姑惡

其名自呼終夜不息俗傳婦被姑  
虐而死化爲此鳥東坡有姑惡詩

### 畫眉

能鳴而好鬪  
褐羽眉白如畫

### 至順鎮江志

### 卷四

望

### 雪姑

毛羽黑白相錯飛則鳴行  
則搖豈所謂春令者耶

### 練帶

土人謂之拖白練似鵲而小尾長  
如曳帶亦名喜相逢又有赤色者

### 斲木

雌者色褐雄者色斑舌端有勾能食木蠹爾雅  
斲木注口如錐長如寸嘗斲樹食蟲因名

### 山鷓

長尾而碧色  
背距皆紅

### 蘆鶯



雀屬也飛鳴蘆葦中其聲扎扎然爾雅所謂鳴鷓剖葦恐是此鳥其注云好剖葦皮食其中蟲因名云江東呼爲蘆虎

巧婦

形甚渺其巢如織唐張祐丹陽閒居雜興詩懸巢巧婦子拂水翦刀花

黃頭

似雀而小性剽疾而善鬪

青菜

背綠腹黃善鳴

伯勞

一名鳴又名博勞左氏傳伯趙氏司至杜注云伯趙伯勞也以夏至鳴冬至止

至順鎮江志

卷四

里

噪天

又名告天似雀而稍大愈鳴則飛愈高力乏則自空投地伏下草中爾雅鷓天鷓注大如鷓雀色似鷓好高飛作聲江東呼爲天鷓豈謂是與鷓亡侯功切音藥

蠟觜

以喙黃得名又名銅觜擲物與之能仰口承取

偷倉

似雀而差小籠蓄易馴雌雄遞放而不相失土人相傳橙樹未實者此鳥來巢則是年著花必實驗之果信

油蠟

似雀黃身黑翎童子多蓄之以爲戲



秀眼

如偷倉大色  
青黃棲竹間

金翅

似雀而翅  
間有黃翎

黃鶴

似鶉而小  
羽足俱黃

十二紅

翅尾各十二翎翎端各有  
紅點又有十二黃亦然

白頭翁

羽毛微綠而顛  
有白毛故名

至順鎮江志

卷四

三

婆餅焦

其聲似之梅聖俞有婆餅焦詩事物記原昔人有遠  
戍其婦山頭望之化為石其姑為餅將以為餉使其  
子偵之恐其焦不可食也往已無及矣因化  
此物但呼婆餅焦也土人呼為山裏鬼叫

提胡蘆

以聲得名梅聖俞  
朱元晦皆有詩

脫卻布袴

亦以其聲名之子瞻魯直皆有詩土人呼為麥熟梳  
大又呼為看蠶看火以此鳥當蠶熟時則鳴故也

烏頭白頰

以形  
得名

山和尚



似鳩而差大緇羽而圓頂故名其聲類猫

### 山棟子

似鳩羣飛喜食棟實

### 鴛鴦

毛色褐而頭白雄雌相逐

### 鷓鴣

毛備五采尾如船柁小于鳧能食短狐

### 鷓鴣

口中吐涎能捕魚土人謂之水老鴉

### 淘河

## 至順鎮江志

### 卷四

四

即鷓鴣又名洿澤陸璣疏形似鷓而極大原長尺餘直而廣口中正赤頰下胡大如數升囊若小澤中有魚便羣共抃水滿其頰而棄之合水竭盡魚在陸地乃共食之

### 鷓

水鳥名以聲得

### 鴟

惡鳴之鳥陸璣云賈誼所謂鴟是也晝目不見物夜則飛鳴

### 鬼車

人莫識其狀遇陰晦則飛鳴云此鳥有十首一為犬所斷聞其鳴則喉犬使吠以厭之歐陽文忠公有鬼車詩其略云此鳥十頭有十口口插一舌連一喉一口出一聲千聲百響更相酬昔周公居東周惡聞此鳥憎若讐夜呼庭氏帥其屬彎弧射逐出九州射之三發不能中天遣天狗從空投自從狗嚙一頭落斷



頸至今清血流每逢陰黑天外過乍見火光輒驚墜  
有時餘血下點宛所遭之家家必破其言必有所自  
蝙蝠

藏屋瓦中形類鼠而有翼畫伏夜起一名伏翼

獸

虎

茅山有黑虎出沒不常蓋神物也

豺

俗呼為豺狗急就章注深毛而狗足劉子曰豺形似犬而健于犬禮記豺祭獸知報本也

鹿

解角獸也爾雅牡麋牝麀其子麋其迹速絕有力麋晉志太興三年四月白鹿見南東海丹徒

至順鎮江志

卷四

巽

獐

有牙而能噬道家以為無魂用供養星辰以其非辰屬宋志明帝泰始三年五月癸酉白獐見東海丹徒

麀

似獐而小說文以為大麀爾雅以為大麀要之非此所謂麀也

野豬

狀類豕而褐毛

兔

古今注兔口有缺尻有九孔論衡兔舐毫而孕及其生子從口而出爾雅其子曰嬖其跡迹絕有力欣

狸

狐之類口銳而尾大狸口方而身文黃黑彬彬蓋次于豹故稱聖人虎別君子豹別辯人狸別是也



獾

有猪獾狗獾淮南子曰獾貉為曲穴

獺

狀如小狗或青或褐水居食魚知報本之獸也記曰獺祭魚淮南子獺穴知水之高下

鼠

穴居晝伏夜動亦有白色者又有松鼠粟鼠又一種名鼠狼善捕鼠雀見之羣聚而噪

刺蝟

土人以其皮治紕絹埤雅云刺端分兩歧者曰蝟如棘針者曰蝟

魚

鱒

至順鎮江志

卷四

吳

出揚子江中大者長丈餘鼻端有脆骨四分身之一兩頰有肉名鹿頭土人呼鱒黃魚作鮮舊以充貢然鱒與黃固是兩種鱒魚肉色白黃魚肉色黃也

時

三月出揚子江中鱗爛白如銀味極肥美然多骨而速腐刁景純懷京口故居詩云鱒鱒美味供春網柑橘清香寄夜航南海志一名三鰲魚彭淵材所謂一恨鱒魚骨是也

鱖

初春出揚子江中形色如刀俗呼為刀鱖爾雅鰩鮓刀注今之鱖魚也俗亦呼為刀魚說文鱖飲而不食刀魚也作鱖非

回

狀類鮎而頭銳出揚子江中東坡所謂粉紅石首仍無骨雪白河豚不藥人者是也



河狔

出揚子江中初春時甚貴春末雖肥大然土人則賤之矣常以葭蒿蘆芽淪而為羹烹魚失所輒能害人歲有被害而死者然人嗜之不已

白

出揚子江者  
亞于淮白

鱸

巨口細鱗出揚子江中然  
有二種曰脆鱸曰爛鱸

鯉

出江中者謂之赤梢本草圖經赤鯉魚脊中鱗一道每鱗上有小黑至三十六鱗陶隱居謂鯉為魚之主神變琴高乘之

至順鎮江志

卷四

罍

金

有鯽有鯉初生正黑色稍大而斑文若瑋瑁漸長乃成金色既老則色如銀矣人家池塘多畜之

青

似鯉鯢而背正色青土人亦以作鮓枕可器皿

鰕

細鱗背有黑斑本草昔仙人劉憑嘗食石桂魚今此魚猶有桂名恐是此也

鰻

頭小而身濶出揚子江甚大杜老所謂縮項鰻

鯉

巨首細鱗池塘中多畜之



鮠

似鯉生  
江湖中

鱖

似鯉而身圓  
味亦差劣

鱈

狀類白魚而色黃  
土人謂之黃頰

鮠

身圓頭匾骨軟  
生江中食泥

鱖

黃色類蛇生沙際蘆葦中或云荇芹根所化或云人  
髮所化隱居曰此魚腹中有子不必盡是化也鱖一

至順鎮江志

卷四

巽

作鮠玉篇鮠市演切魚似蛇梁邵陵王綸攝南徐州  
事輕險躁虐喜怒不常遨遊市里雜于厮隸嘗問賣  
鮠者曰刺史何如對者言  
其躁虐綸怒令吞鮠以死

鮠

似鱖而短黑  
色生汗瀆中

鰻

類鱖而肥大生揚子江  
中秋間遇風雨則出

針口

首戴針芒身長五六寸許舊  
出揚子江蒜山下今徙他所

銀條

色白如銀舊出石公渡頭今亦徙他  
所又出金壇長塘湖中大者長尺許



吐鮓

首大而身小黑  
色出金壇湖溪

黃頰

一名鮓鮓兩頰有骨  
如鋸本草云能醒酒

橋丁

圓長細鱗大  
者不過尺許

邵陽

出揚子江中形圓如扇無鱗色黃口  
生腹下尾細而長浙東人呼為鮓魚

江豚

生揚子江中狀如豚黑色出沒波濤間鼻中作聲其  
出必有大風土人以此占候許渾詩江豚吹浪夜還

至順鎮江志

卷四

巽

風陳藏器云其脂作燈照樗蒲  
即明照讀書則闇言懶婦所化

鼈

出揚子江中本草圖經鼈之大者為鼈或有闕一二  
丈者南人捕而食之其肉有五色生卵大如雞鴨子  
一產二百枚人亦  
掘取以鹽淹可食

龜

有山龜水龜西門永安寺聖井中產綠毛金線  
龜齊志永明八年延陵縣前澤畔獲毫龜一枚

鼈

土人呼為團魚本草鼈生丹陽池澤中其甲九肋者  
為勝今練湖所產或有九肋者唐志貞元三年潤州  
魚鼈蔽江而  
下皆無首

蟹



俗呼旁蟹以其橫行故也義見周禮疏本草蟹至八月卽銜稻芒兩莖長寸許東嚮至海輸送蟹王之所陸魯望所謂執穗以朝其魁是也

螺

小者名螺螄大者名曰田螺

廬

生河渠中又有小者名蜺

蝦

長鬚有青白二種

蟲

蟬

至順鎮江志

卷四

辛

卽蜩也詩五月鳴蜩秋鳴者曰蟬土人謂之螂螬飲而不食有大小數種大者元小者碧詩疏海岱之間謂之蟬此通語也本草又名蛸螬

蝶

種類甚多要皆草木蠹蟲所化古今注江東謂之撻末色白背青者是也其大如蝙蝠或黑色或青斑名曰鳳子又名鳳車

蜂

細腰者名黃蜂黑而大者名胡蜂釀蜜者名蜜蜂日有兩衙應潮候皆能螫人

蜻蜓

水蟲所化爾雅虻蛭負勞注卽蜻蜓也江東呼爲狐梨

螳螂



奮臂若斧捕蟬而食爾雅一名不過一名莫狝其子名螻蛸月令仲夏螳螂生狝音鶴土人呼爲斷娘

### 促織

蝥蟋蟀蜻蛚莎雞絡緯皆其別名陸璣又云楚人謂之王孫幽州人謂之趨織趨音促自昔皆不言其善鬪今土人多畜而鬪之者

### 螢

腐草所化夜飛腹下有光爾雅螢火卽炤詩熠燿宵行古今注一名燐一名宵燭一名丹鳥大戴禮丹鳥羞白鳥丹鳥謂丹良也白鳥蚊蚋也有翼者爲鳥

### 蚱蜢

種類不一長股善躍詩嘒嘒草蟲趨趨阜螽是也陸璣云幽州人謂之春箕以兩股相切作聲然不能鳴者其類尤多

## 至順鎮江志

### 卷四

五

### 蚯蚓

白頭者可入藥孟子所謂上食槁壤下飲黃泉者也此物本不能鳴其鳴者蟪蛄耳陳簡齋詩云不知墻角蚯蚓方長哦蓋誤也

### 蠶

性巧善結網取飛蟲以充食爾雅翼在地中布網者名土蜘蛛絡幕草上名草蜘蛛又一種名蟪子能捕蠶者曰蠶虎

### 蝸牛

俗呼爲旱螺蝸一作瓜蛞蝓而負殼者也蛞蝓俗呼爲蜒蚰

### 蝦蟇

本草一名蟾蜍埤雅云蝦蟇背有黑點身小能跳啞百蟲善鳴與蟾蜍不同蟾蜍腹大背黑皮上多疥磊



行動遲緩蝦蟇之子謂之科斗

鼃

似蝦蟇而長跨瞋目如怒一名水雞土人謂之田雞可食韓昌黎所謂近亦能稍稍是也背著青綠色謂之青蛙背著黃文謂之金線蛙亦謂之蛤

蜥蜴

似蛇而小四足備五色者為雄餘者為雌喜緣籬壁形小而黑者蠃蜥東方朔云是非守宮即蜥蜴如此則蠃蜥又名守宮矣又一種名蛇師又名蝎虎茅山池中有小龍子狀類蜥蜴腹下有朱書若符篆者可謂靈物也

蛻蝦

一名蛻蛻莊子云蛻蛻轉丸關尹子曰蛻蝦轉丸九成精思之而有蛻白者存丸中俄去殼而蟬彼蛻不

至順鎮江志

卷四

三

思彼輓奚白

蠅

有數種酉陽雜俎其類有蒼者聲雄壯負金者聲清聒其聲在翼身青者能敗物巨者頭如火

蟻

有大小數種又有飛蟻善蠹爾雅翼有翅而飛者名蟻其子名蚘

蚊

一名白鳥見前螢注又名黍民見崔豹古今注辨疑志云潤州城南萬歲樓俗傳樓上煙出不祥開元前以潤州為凶闕董璠為江東採訪使嘗居此州其時盡日煙出刺史皆憂懼乾元中復然圓可一尺餘直上數丈吏密伺其煙迺出于樓角隙中迎而視之即蚊蚋也今郡城中惟嘉定橋南上河街無之理不可詰



蛇

種類不一曰赤練曰青竹曰菜花曰土  
灰曰慈鰻曰皂角斑惟烏稍可入藥

載

生樹葉間有毒能螫人說文毛蟲爾雅  
蝮毛蟲楚辭云載緣兮我裳音干字切

蝮

金壇縣唐大厯中有北人為主簿以竹筒齎蝮十餘  
枚置于廳事後遂孳育至百餘為土氣所蒸而不能  
螫人南民不識呼為  
主簿蟲見太平廣記

至順鎮江志

卷四

三

至順鎮江志卷四終

丹徒于念勛壽茲校字